



Jumat, 19 November 2021
Ogen: Hakim-hakim 4:9



Kehamaten ras Kemenangan



Nande Kelesa mengombang man cimbangna nande Saimara, erkiteken ia lit anakna dilaki tapi cimbangna e la lit anakna dilaki. Emaka rusur ibelinkenna bana ras anakna si dilaki e, ikatakenna pe man anak cimbangna si diberu e kerina, maka labo lit ergana anak diberu adi la lit turangna. Tapi amin bage gia nande Saimara tetap ertoto man Tuhan janah ididikna anak-anakna si diberu e kerina guna erkemalangen man Tuhan, isekolahkenna bas sekolah formal, deba si la nggit kuliah i kursuskenna njait ras tata boga. Tamat SMK ras kuliah anak nande Saimara ndai erdahin kerina, sampatina nandena, mekuah atena kerina man nandena. Kebalikenna si nande Kelesa, erkiteken mbiar kal bene anak dilaki ndai; peasi-asina, la iberekenna tanggungjawab, seh galang pe jadi anak manja.

Kemulian, kehamaten ras kemenangen e labo itentukan jenis kelamin, buena sen ntah kebayaken secara doni ngenca. Kerina e ialoken arah kita erkemalangen man Tuhan ras perkuah ateNa. Debora sekalak hakim diberu, tapi ipindoken Barak ia maka nampati i bas perang ngelawan musuh Israel i taneh Kanaan. Tuhan mereken kemenangen e man Debora. Amin gia secara logika labo mungkin gegehen Debora asa Barak, labo mungkin gegehen diberu asa dilaki. Erkiteken nggit ipake Tuhan i bas ndahiken dahin, amin gia dahin enda semalna idahiken sekalak dilaki, ibere Tuhan dalam ras gegeh.

Kerina jelma meherga ras patut iergaken. Ulalah kita ngenen jelma erpalasken sukaten doni. Ula ka pe si akap sikapen kita asangkan kalak si deban seh maka kita megombang man bana. Janah ise pe kita, mesera pe pergeluhta adina nggit erkemalangen man Tuhan, dahiken sura-suraNa, iberekenNa kehamaten ras kemenangen banta. Teklah!!